

Recordando 35 año fayecimiento di Alex (Echi) Odor

Dia 12 di Augustus ta 35 año pasa cu nos a perde un gran baluarte, un gran musico cu ta Alex (Echi) Odor

Scirbi pa Jesus "Joy" Kock

Alex Gerard Odor

Naci na Aruba, 7 Dec. 1938.

A fayece 12 Aug. 1983. Cu ta 35 año pasa

Number di Cariño: Echi.

Tabata casa cu Alejandra Josefa (Luly) Odor - Scharbaay y tabatin 4 yiu.



Cu edad hoben Echi a cuminsa toca den banda di frère esta St. Michael. Saxophone alto tabata su prome instrumento y atravez di su carera briyante como musico a toca tur e saxophonenan, esta: alto, tenor, soprano, baritone y tambe "dwarsfluit". Despues di a laga banda di frère, manera e orkestra filarmónico tabata ser yama popularmente, Echi a bai toca cu "Los Duques Del Caribe". "Los Duques" tabata bou di direccion di Toti Arends. Aruba Caribbean Hotel a ser inaugura na Juli 17, 1959. "los Duques" tabatin e honor di ta e prome agrupacion musical di Aruba cu a toca den e hotel. Nan tabata toca den e famoso "Bali Bar". Echi tabatin apenas 20 año di edad den e epoca ey, siendo ya caba un semi-profesional. Echi a forma un agrupacion nobo hunto cu e musiconan: Harry Rodriguez, Herman Stephens, Donny Mackay, Humphrey v/ Trikt y Kenneth v/d Kuip, bou di e number "Hap Cats". E agrupacion a specialisa den musica pa hubentud y despues riba musica popular en general. "Hap Cats" a stop di existi y Echi a integra su mes den un orkestra bou di direccion di e maestro Mario Bislick, cual tabata "Nueva Sensacion". Despues di "Nueva Sensacion", Echi hunto cu Joy Kock, Herman Stephens, Tico Quilotte, Eddy Simon, Stanley la Cruz y despues Chester Alexander a forma e popular sexteto "Oruba Sextet", number cu Echi a inventa riba e number bieu di Aruba segun nos grandinan "Oro Hubo". A forma "Oruba Sextet" specialmente pa toca den nos hotelnan "High Rise". E agrupacion aki a habri e di dos hotel grandi di Aruba cu tabata "Sheraton Hotel" na año 1968. Echi a converti su mes den un berdadero profesional, un musico cu un "feeling" inmenso. E

agrupacion "Oruba Sextet" tabata toca den e club nocturno "Diablo" y durante fin di siman semper e club tabata completamente yen cu hopi local. Durante di siman tambe e club semper ta bon bishita pa turistanan, pa motibo cu e musica tabata excelente. "Oruba Sextet" tabata asina profesional musicalmente cu e cadena prestigioso di "Sheraton" a ofrece nan un contract pa un gira mundial. Esaki e sexteto a rechaza pa motibo di trabou diario di e diferente musiconan. Sinembargo e oferta tabata un honor grandi y prueba con bon "Oruba Sextet" tabata toca cu Echi como su lider. Despues di tempo e musiconan cu tabata forma "Oruba Sextet" a cansa di toca tur anochi den hotel y a forma "Poder Latino" of tambe "Latin Power". Un orkestra grandi y formal cu dos saxophonista cu tabata Alex Odor y Joy Kock, dos trompetista: Donny Geerman y Eddy Giel. Un trombonista: Ossy Henrique. Cantante: Tito Flores den feliz memoria, Henky Braafhart y Tico Quilotte. Ritmo: Shonwe Stede, Karel Lopez, Harry Rodriguez, Mario Middendorp, Hubert (Oily) Busby y pianista: Herman Stephens. "Poder Latino" a toca na Colombia, Venezuela y Corsow. Despues di cuater año e banda a stop di existi y cada musico a bai toca den diferente otro grupo. Echi a bai toca cu "La Reencarnación" y despues cu "Musical Time". Ambos banda tabata hopi popular. Echi tabata un saxophonista y flautista por excelencia. E sonido cu Echi a produci riba su

sax tabata unico. Un vibrato excepcional y su tempo manera un metronome. Tambe Echi a yega di toca na New York, Hulanda y otro paisnan. Echi a sigui toca den diferente banda na hotel como "lead-man". E ultimo banda cu e la forma parti di dje tabata "The High Notes" cu Amado Rosina na Holiday Inn. Den e banda aki Echi a compaña artistanan (cantantenan) internacional durante di show tur anochi. Echi tabata un "first sight reader of music" pues lesa musica na prome bista. Durante su briyante carera como musico tambe Echi a siña skirbi musica pa orkestra, esta traha arreglo musical. Como compositor Echi a compone e.o. un balada "You'll have to know". E balada sentimental aki a ser toca durante su entierro como despedida. Como "studio-musician" e la haci masha hopi grabacion cu diferente artista. Echi a bai laga nos y un "bashi" grandi semper a keda atras. Su yiu homber Alex Odor Jr. ta tocando piano actualmente. Claudius Philips, cu un tempo a toca cu Echi den "Musical Time", a compone un balada inspira riba e bida ehemplar di Echi. Titulo di e balada "En cada nota cantaré tu voz". E cancion a sali den e 10 finalistanan na Aruba y despues Claudius a gana festival di O.T.I. Antillas 1983 na Corsow. Den e festival O.T.I. cu ta mundialmente conoci teni na 1983 na Washington D.C. e cancion a sali como di dos finalista, e puesto di mas halto cu Aruba a yega di obtene den festival di O.T.I. A dedica e cancion

na Echi. Na yegada na aeropuerto Claudius y comitiva a ser ricibi grandemente pa pueblo di Aruba. Compositor: Claudius Philips. Areglista y director musical: Franklin Granadillo. Claudius a sali segunda finalista, e puesto internacional di O.T.I mas halto cu Aruba a logra.

"En cada nota cantaré tu voz".

Poco a poco
diste mucho sin pedir
solo amistad y un
poco de amor.

Poco a poco
te ganaste el corazón
de quién luchó por
la verdad como tú.

Refr:
Siempre habrá un lugar aquí
a que nadie llenará
en cada nota cantaré tu voz.

Por eso ven cantemos
juntos esta melodía de amistad
para sentirnos tan unidos
como ayer.

Que el cielo sienta tu presencia
y nosotros de ahora en más.
Aprendamos a querernos de verdad.
Que la vida pasa pronto y
se nos va.

Tan de pronto
como un sueño que
se rompe al despertar
así se fué tu luz.

Sinembargo
el camino que marcó
tu firme andar
no fué en vano.

Refr:
Siempre habrá.....
Que el cielo sienta tu presencia
y nosotros de ahora en más.
Aprendamos a querernos de verdad.
Que la vida pasa pronto y

se nos va.
Que la vida se nos va.
Nota: nos mester recorda nos baluartenan semper.
Joy Kock